

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona”, broj: 7/10 i 3/23), a u vezi sa članom 43. stav (1) i (2) i članom 52. stav (1) Zakona o izvršavanju Budžeta Zeničko-dobojskog kantona za 2026. godinu („Službene novine Zeničko-dobojskog kantona“, broj: 24/25), na prijedlog Ministarstva za poljoprivredu, šumarstvo i vodoprivredu, Vlada Zeničko-dobojskog kantona, na 122. sjednici, održanoj 27.03.2026. godine, d o n o s i

## **O D L U K U**

### **o usvajanju Programa utroška sredstava Budžeta Zeničko-dobojskog kantona za poticaje u poljoprivredi za 2026. godinu („Subvencije za podsticaj razvoja u poljoprivrednoj proizvodnji“ – izvor 10)**

#### **Član 1.**

##### **(Predmet)**

Usvaja se Programa utroška sredstava Budžeta Zeničko-dobojskog kantona za poticaje u poljoprivredi za 2026. godinu, razdjelu 23, budžetska organizacija 01, potrošačka jedinica 0001, Budžeta Zeničko-dobojskog kantona za 2026. godinu („Službene novine Zeničko-dobojskog kantona", broj: 24/25 i 5/26), ekonomski kod 614400, NAD 402, pozicija "Subvencije za podsticaj razvoja u poljoprivrednoj proizvodnji“ – izvor 10, u iznosu od 7.700.000,00 KM (slovima: sedam miliona sedamstotinhiljada konvertibilnih maraka) i čini sastavni dio ove odluke.

#### **Član 2.**

##### **(Način realizacije sredstava)**

Sredstva planirana ovim programom utroška sredstava realizovat će se isključivo u skladu sa mjesečnim i kvartalnim operativnim planovima izvršenja Budžeta odobrenim od strane Ministarstva finansija, osim u izuzetnim slučajevima odobrenim posebnim aktima Vlade Zeničko-dobojskog kantona.

#### **Član 3.**

##### **(Realizacija Odluke)**

Za realizaciju ove odluke zadužuju se Ministarstvo za poljoprivredu, šumarstvo i vodoprivredu i Ministarstvo finansija, svako u okviru svojih nadležnosti.

#### **Član 4.**

##### **(Stupanje na snagu)**

Odluka stupa na snagu danom donošenja i objavit će se u „Službenim novinama Zeničko-dobojskog kantona“.

Broj: 02-11-6301/26

Datum, 27.03.2026. godine

Zenica

**PREMIJER**

*Nezir Pivić*

DOSTAVLJENO:

1x Ministarstvo za poljoprivredu, šumarstvo i vodoprivredu,

1x Ministarstvo finansija,

1x „Službene novine Zeničko-dobojskog kantona“,

1x a/a.



**BOSNA I HERCEGOVINA**  
**FEDERACIJA BOSNE I HERCEGOVINE**  
**ZENIČKO-DOBOJSKI KANTON**  
**MINISTARSTVO ZA POLJOPRIVREDU,**  
**ŠUMARSTVO I VODOPRIVREDU**

***PROGRAM***

*utroška sredstava Budžeta Zeničko-dobojskog kantona  
za poticaje u poljoprivredi za 2026. godinu  
„Subvencije za podsticaj razvoja  
u poljoprivrednoj proizvodnji“ - izvor 10*

**Zenica, mart 2026. godine**

**PROGRAM**  
**utroška sredstava Budžeta Zeničko-dobojskog kantona**  
**za poticaje u poljoprivredi za 2026. godinu**

**Opći podaci o Programu**

1. Program je usvojen: Na 122. sjednici Vlade Zeničko-dobojskog kantona održanoj 27.03.2026. godine.
2. Period realizacije Programa: Isplata podrški za poljoprivredne proizvodnje koje su realizovane u periodu od 01. 01. do 31. 12. 2026. godine. U ovom periodu izvršit će se i isplata podrški za proizvodnje koje su započete u 2025. godini, a završene u 2026. godini.
3. Ukupna vrijednost Programa: 7.700.000,00 KM
4. Namjena Programa: Podrška primarnoj animalnoj i biljnoj proizvodnji, prerađivačima i otkupljivačima, kapitalnim ulaganjima u poljoprivredi i ostalim vrstama podrške.
5. Korisnici Programa: Poljoprivredni proizvođači, zadruge, otkupljivači, prerađivači poljoprivrednih i prehrambenih proizvoda i dr.
6. Izvor sredstava: Budžet Zeničko-dobojskog kantona za 2026. godinu - ("Službene novine Zeničko-dobojskog kantona" broj: 24/25 i 5/26) „Subvencije za podsticaj razvoja u poljoprivrednoj proizvodnji"- Izvor 10, razdjel 23, budžetska organizacija 01, potrošačka jedinica 0001, ekonomski kod 614400, NAD 402 i Zakon o izvršavanju Budžeta Zeničko- dobojskog kantona za 2026. godinu ("Službene novine Zeničko-dobojskog kantona" broj: 24/25).
7. Nosilac Programa: Ministarstvo za poljoprivredu, šumarstvo i vodoprivredu Zeničko-dobojskog kantona.
8. Odgovorna osoba: Jasmin Čajić, ministar

## I NAZIV PROGRAMA

Program utroška sredstava Budžeta Zeničko-dobojskog kantona za poticaje u poljoprivredi za 2026. godinu, u razdjelu 23, budžetska organizacija 01, potrošačka jedinica 0001, Budžeta Zeničko-dobojskog kantona za 2026. godinu („Službene novine Zeničko-dobojskog kantona”, broj: 24/25 i 5/26), ekonomski kod 614400 NAD 402, pozicija „Subvencije za podsticaj razvoja u poljoprivrednoj proizvodnji“ - Izvor 10.

## II ZAKONSKI OSNOV ZA PROGRAM

Programom utroška sredstava Budžeta Zeničko-dobojskog kantona za poticaje u poljoprivredi za 2026. godinu određuje se godišnji iznos sredstava novčanih podrški, vrste mjera i raspodjela sredstava po mjerama, te opći i posebni kriteriji za njihovo ostvarivanje. Kod izrade Programa utroška sredstava Budžeta Zeničko-dobojskog kantona za poticaje u poljoprivredi za 2026. godinu (u daljem tekstu: Program) vodilo se računa o:

- a) Zakonu o poljoprivredi („Službene novine Federacije BiH“, broj: 88/07, 4/10, 27/12, 7/13 i 82/21)
- b) Zakonu o novčanim podrškama u poljoprivredi i ruralnom razvoju („Službene novine Federacije BiH“, broj: 42/10 i 99/19); (u daljem tekstu: Zakona o novčanim podrškama)
- c) Principima Strategije razvoja Zeničko-dobojskog kantona za period 2021.-2027. godina Odluka o usvajanju Strategije razvoja Zeničko-dobojskog kantona za period 2021.-2027. godina („Službene novine Zeničko-dobojskog kantona“, broj: 3/21)
- d) Zakonu o izvršenju Budžeta Zeničko-dobojskog kantona za 2026. godinu („Službene novine Zeničko-dobojskog kantona“, broj: 24/25).

U izradi Programa za 2026. godinu korišteni su sljedeći parametri:

- proizvodne resursne mogućnosti Zeničko-dobojskog kantona,
- mjere Strategije razvoja Zeničko-dobojskog kantona za period 2021.-2027.godina,
- kontinuitet poticajnih mjera,
- analize realizacije podrški u proteklom periodu,
- mogućnosti plasmana poticajnih proizvodnji,
- sinhronizacija sa federalnim podrškama,
- preporuke stručnih poljoprivrednih službi Ministarstva, koje neposredno na terenu prate kretanja u poljoprivrednoj proizvodnji i prerađivačkim kapacitetima prehrambene industrije,
- preporuke registrovanih poljoprivrednih udruženja i poljoprivrednih zadruga sa područja Zeničko-dobojskog kantona.

U Programu poticaja za 2026. godinu realizovat će se prioritetne mjere novčanih podrški po modelu poticaja proizvodnji i dio mjera strukturne politike koje trebaju doprinijeti ispunjavanju sljedećih ciljeva:

- a. unapređenje poljoprivredne proizvodnje i povećanje obima korištenja poljoprivrednog zemljišta s ciljem jačanja konkurentnosti na domaćem i inozemnom tržištu,
- b. uspješnije uvođenje novih tehnologija,
- c. uvezivanje primarnih poljoprivrednih proizvođača sa prerađivačima/otkupljivačima u Zeničko-dobojskom kantonu,
- d. povećanje otkupa poljoprivrednih proizvoda sa područja Zeničko-dobojskog kantona;
- e. očuvanje stočnog fonda,
- f. povećan nivo korištenja poljoprivrednog zemljišta i šira primjena agrotehničkih mjera u obradi zemljišta,
- g. povećan nivo korištenja ukupno raspoloživih resursa za poljoprivrednu proizvodnju,
- h. povećano upošljavanje u primarnoj poljoprivrednoj proizvodnji i prehrambenoj industriji;
- i. povećanje finansijskih ulaganja u primarnu poljoprivrednu proizvodnju, a posebno u prehrambenu industriju,
- j. osiguranje stabilnog poljoprivrednog dohotka i omogućavanje adekvatnog životnog standarda poljoprivrednih proizvođača.

### **III SVRHA I CILJ PROGRAMA**

Svrha Programa je nastaviti podršku prioritetnim mjerama u okviru raspoloživog budžeta, kako bi se osigurala kontinuirana isplata poticaja proizvodnji i plaćanja u sklopu mjera strukturne politike za 2026. godinu. Direktnim podrškama, kao i strukturnim mjerama, želi se osigurati dugotrajna održivost poljoprivrednih gazdinstava koja obavljaju poljoprivrednu djelatnost u biljnoj i animalnoj proizvodnji. Pored modela poticanja proizvodnji, u Programu su zastupljeni i drugi modeli novčanih podrški iz Zakona o novčanim podrškama u poljoprivredi i ruralnom razvoju.

#### **A/ Podrška poljoprivrednoj proizvodnji**

##### **A/1 Animalna proizvodnja**

- Podrška za proizvodne farme za tov brojlera
- Podrška za držanje koka nosilja
- Podrška za registrovane farme goveda
- Podrška za registrovanu ovčarsku ili kozarsku proizvodnju
- Podrška za registrovanu svinjogojsku proizvodnju
- Podrška za registrovani uzgoj izvornih i zaštićenih pasmina životinja
- Podrška za pčelarsku proizvodnju

##### **A/2 Biljna proizvodnja**

- Podrška za poljoprivrednu proizvodnju u plastenicima i staklenicima
- Podrška za proizvodnju maline, kupine, plantažne borovnice, ribizle i aronije
- Podrška za proizvodnju krastavca-kornišona
- Podrška za zasnivanje novih zasada jagodičastog voća
- Podrška za zasnivanje novih zasada koštičavog, jabučastog i jezgrastog voća
- Podrška za proizvodnju gljiva
- Podrška za registrovanu proizvodnju jagodičastog voća i ostalog voća

##### **A/3 Organska proizvodnja**

- Podrška za registrovanu organsku poljoprivrednu proizvodnju

#### **B/ Podrška otkupljivačima/prerađivačima**

- Podrška otkupljivačima/prerađivačima mlijeka
- Podrška otkupljivačima/prerađivačima pilećeg mesa
- Podrška otkupljivačima svježeg povrća i voća
- Podrška otkupljivačima ljekovitog bilja
- Podrška otkupljivačima jagodičastog voća
- Podrška prerađivačima jagodičastog voća

#### **C/ Podrška kapitalnim ulaganjima**

- Podrška za nabavku mehanizacije za poljoprivredu
- Podrška projektima u poljoprivredi
- Podrška za nabavku plastenika
- Podrška za uspostavu cjelovitog sistema navodnjavanja uz izgradnju bunara

#### **D/ Ostale vrste podrški**

- Podrška za ujednačeni razvoj općina ruralnog područja Zeničko-dobojskog kantona
- Nerealizovani zahtjevi iz prethodnog perioda i pomoć u posebnim okolnostima

## **IV IZVORI FINANSIRANJA I VISINA SREDSTAVA**

Budžetom Zeničko-dobojskog kantona za 2026. godinu („Službene novine Zeničko-dobojskog kantona“, broj: 24/25 i 5/26 ), u razdjelu 23, budžetska organizacija 01, potrošačka jedinica 0001, ekonomski kod 614400 NAD 402, pozicija „Subvencije za podsticaj razvoja u poljoprivrednoj proizvodnji“ – Izvor 10, planirana su sredstva u iznosu od 7.700.000,00 KM (slovima: sedam miliona sedamstotinhiljada konvertibilnih maraka).

Utvrđeni iznos realizovaće se u skladu sa prilivom sredstava u Budžetu, a na bazi mjesečnih operativnih planova.

## **V KRITERIJI ZA RASPODJELU SREDSTAVA**

Odobrena finansijska sredstva iz Budžeta Zeničko-dobojskog kantona za 2026. godinu pod stavkom „Subvencije za podsticaj razvoja u poljoprivrednoj proizvodnji“ - Izvor 10 opredjeliti će se Korisnicima, prema općim i posebnim kriterijima.

### **1. OPĆI KRITERIJ**

Pravo na ostvarivanje podrški stiču:

- korisnici koji su ostvarili primarnu poljoprivrednu proizvodnju ili koji poljoprivrednu djelatnost obavljaju na teritoriji Zeničko-dobojskog kantona, ako to ovim Programom nije drugačije propisano,
- korisnici koji imaju stalno mjesto prebivališta, odnosno pravna lica koja imaju sjedište ili poslovnu jedinicu sa sjedištem na području Zeničko-dobojskog kantona,
- korisnici upisani u registar gazdinstava/klijenata kao nosioci,
- korisnici koji su izmirili dospjela poreska i druga dugovanja prema Zeničko-dobojskom kantonu,
- korisnici mlađi od 35 godina imaju dodatak do 10% na ukupnu obračunatu podršku po osnovu prijavljene registrovane proizvodnje,
- korisnici koji pored općih kriterija ispunjavaju i posebne kriterije propisane ovim Programom i Uputstvom o ostvarivanju novčanih podrški za poljoprivrednu proizvodnju ili djelatnost u poljoprivredi u 2026. godini (u daljem tekstu: Uputstvo), koje donosi ministar Ministarstva za poljoprivredu, šumarstvo i vodoprivredu Zeničko-dobojskog kantona,

### **2. POSEBNI KRITERIJI**

#### **A/ PODRŠKA POLJOPRIVREDNOJ PROIZVODNJI**

##### **A/1 Animalna proizvodnja**

- 1. Podrška za proizvodne farme za tov brojlera** – Podržavaju se proizvodne farme za tov brojlera, kod proizvođača koji su registrovali djelatnost za ovu proizvodnju, koji u vlastitim ili zakupljenim objektima imaju najmanje 300 m<sup>2</sup> površine proizvodnog dijela objekta za tov brojlera sa iznosom do 4,00 KM/m<sup>2</sup> proizvodnog dijela farme a ukoliko ispunjavaju i druge kriterije koji će biti propisani Uputstvom.

Konačan iznos podrške po jednom farmskom objektu za tov brojlera bit će utvrđen nakon sublimiranja ukupne proizvodne površine farmi koje će biti predmetom podrške.

Cilj: zadržati dostignuti nivo proizvodnje, odnosno zadržati u proizvodnji isti broj farmi sa tendencijom povećanja produktivnosti.

- 2. Podrška za držanje koka nosilja** – Podržava se držanje koka nosilja za farme koje posluju u okviru registrovane djelatnosti sa useljenim 18-nedjeljnim pilenkama lake linije u visini do 2,00 KM/pilenki. Proizvodnja se može obavljati u vlastitom ili zakupljenom objektu na području Zeničko-dobojskog kantona. Minimalan broj koka nosilja koji se podržava je 1.500 ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo proizvodnje.
- 3. Podrška za registrovane farme goveda** – Podržavaju se farme muznih grla koje su registrovane kao pravna lica ili obrti sa osnovnom djelatnošću prema Zakonu o obrtu i srodnim djelatnostima i koje imaju minimalno 5 muznih grla u kategoriji krave u laktaciji starijih od 24 mjeseca. Iznos podrške je do 650,00 KM/muznom grlu.  
Farme sa minimalno 15 krava starijih od 24 mjeseca, registrovane kao obrt ili pravno lice a koje ne plasiraju mlijeko i prerađevine od mlijeka u otkup/tržište niti mlijeko koriste za vlastite potrebe za ljudsku ishranu podržavaju se u visini do 150 KM/krava, ukoliko su ispunjeni i drugi kriteriji koji će biti propisani Uputstvom. Maksimalan iznos podrške po jednom subjektu je do 25.000,00 KM.  
Cilj: zadržati dostignuti nivo proizvodnje.
- 4. Podrška za registrovanu ovčarsku ili kozarsku proizvodnju** – Podržavaju se registrovane ovčarske ili kozarske proizvodnje koje su registrovane kao pravna lica ili obrti sa osnovnom djelatnošću prema Zakonu o obrtu i srodnim djelatnostima.  
Iznos podrške je do 4.000,00 KM ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo proizvodnje.
- 5. Podrška za registrovanu svinjogojsku proizvodnju** – Podržava se svinjogojska proizvodnja za one proizvođače koji su registrovani kao pravna lica ili obrti sa osnovnom djelatnošću prema Zakonu o obrtu i srodnim djelatnostima.  
Iznos podrške je do 3.000,00 KM ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo proizvodnje.
- 6. Podrška za registrovani uzgoj izvornih i zaštićenih pasmina životinja** - Podržavaju se fizička i pravna lica, registrovani uzgajivači izvornih i zaštićenih pasmina životinja (bosanski brdski konj, domaća buša, domaći magarac i pas tornjak) u čistoj krvi, koji svoju proizvodnju obavljaju u registrovanim ergelama, farmama i uzgajivačnicama na području Zeničko-dobojskog kantona. Iznos podrške je do 4.000,00 KM po jednom subjektu ukoliko su ispunjeni i drugi kriteriji koji će biti propisani Uputstvom.  
Cilj: Sačuvati i unaprijediti tradiciju i baštinu uzgoja autohtonih pasmina životinja na području Zeničko-dobojskog kantona.
- 7. Podrška za pčelarsku proizvodnju** – Podržavaju se pčelari koji ne ostvaruju podršku za druge poljoprivredne proizvodnje, iznosom do 7,00 KM/pčelinjem društvu za fizička lica a za registrovanu pčelarsku proizvodnju kao osnovnu djelatnost registrovanu po Zakonu o obrtu i srodnim djelatnostima, iznosom do 3.000,00 KM/obrtu.  
Cilj: stimulisati proizvodnju meda i pčelarenje u skladu sa važećom zakonskom regulativom i zadržati dostignuti nivo proizvodnje.

## A/2 Biljna proizvodnja

- 8. Podrška za poljoprivrednu proizvodnju u plastenicima i staklenicima** – Podržavaju se poljoprivredni proizvođači koji imaju registrovanu poljoprivrednu djelatnost kao osnovnu djelatnost registrovanu po Zakonu o obrtu i srodnim djelatnostima i pravni subjekti u iznosu do 7,00 KM/m<sup>2</sup>, ukoliko su ispunjeni i drugi kriteriji koji će biti propisani Uputstvom.  
Cilj: povećati površinu pod plasteničkom proizvodnjom i povećati broj uposlenih.

- 9. Podrška za proizvodnju maline, kupine, ribizle, plantažne borovnice i aronije** – Podržava se proizvodnja maline, kupine, plantažne borovnice i aronije sa iznosom do 0,70 KM/kg a koju predaju otkupljivaču/prerađivaču registrovanom na području Federacije Bosne i Hercegovine. Konačan iznos podrške po jednom kg odredit će se nakon sumiranja prijavljene količine maline, kupine, plantažne borovnice i aronije koja je predmet podrške, ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo proizvodnje i intenzivirati podizanje novih zasada.
- 10. Podrška za proizvodnju krastavca-kornišona** – Podržava se organizovana proizvodnja krastavca-kornišona u iznosu do 0,30 KM/kg za fizička lica ili proizvođače koji imaju registrovanu poljoprivrednu djelatnost kao osnovnu djelatnost registrovanu po Zakonu o obrtu i srodnim djelatnostima i ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo proizvodnje uz povećanje produktivnosti, povećanje broja proizvođača, jačanje kapaciteta otkupljivača i povećanje broja proizvođača koji imaju registrovani obrt.
- 11. Podrška za zasnivanje novih zasada jagodičastog voća** – Podržava se zasnivanje novih zasada jagodičastog voća za fizička, pravna lica ili proizvođače koji imaju registrovanu poljoprivrednu djelatnost kao osnovnu djelatnost registrovanu po Zakonu o obrtu i srodnim djelatnostima, sa iznosom do 600,00 KM/0,1 ha, u zavisnosti od broja prispjelih zahtjeva, ukoliko su ispunjeni i drugi kriteriji koji će biti propisani Uputstvom.  
Cilj: sačuvati postojeći nivo podizanja zasada jagodičastog voća sa namjerom obnavljanja postojećih zasada.
- 12. Podrška za zasnivanje novih zasada koštičavog, jabučastog i jezgrastog voća** - Podržava se zasnivanje novih zasada koštičavog, jabučastog i jezgrastog voća sa iznosom do 600,00 KM/0,1 ha za pravna lica i obrte, a za fizička lica u iznosu do 400,00 KM/0,1 ha, a sve u zavisnosti od broja prispjelih zahtjeva ukoliko su ispunjeni i drugi kriteriji koji će biti propisani Uputstvom. Cilj: zadržati dostignuti nivo podignutih zasada i intenzivirati podizanje novih intezivnih zasada koštičavog, jabučastog i jezgrastog voća.
- 13. Podrška za proizvodnju gljiva** – Podržava se proizvodnja gljiva (šampinjona i bukovače) sa 50,00 KM/toni kupljenog komposta za fizička lica, pravna lica i obrte koji imaju registrovanu poljoprivrednu djelatnost kao osnovnu djelatnost registrovanu po Zakonu o obrtu i srodnim djelatnostima, te da ispunjavaju i druge kriterije koji će biti propisani Uputstvom. Maksimalan iznos podrške po jednom subjektu je do 30.000,00 KM.  
Cilj: zadržati dostignuti nivo proizvodnje i ostvariti plasman proizvoda na domaćem i inostranom tržištu.
- 14. Podrška za registrovanu proizvodnju jagodičastog voća i ostalog voća** – Podržava se proizvodnja jagodičastog voća i ostalog voća za proizvođače na teritoriji Zeničko-dobojskog kantona koji imaju registrovan obrt u poljoprivrednoj djelatnosti po Zakonu o obrtu i srodnim djelatnostima kao osnovnu djelatnost za proizvodnju jagodičastog voća i ostalog voća registrovanih za tu vrstu djelatnosti. Pravo na novčanu podršku ne mogu ostvariti obrti koji imaju više registrovanih djelatnosti u različitim oblastima poljoprivredne proizvodnje i za iste ostvaruju novčanu podršku iz ovog Budžeta. Iznos podrške je do 3.000,00 KM po registrovanom obrtu ukoliko su ispunjeni i drugi kriteriji koji će biti propisani Uputstvom.  
Cilj: povećati broj komercijalnih proizvođača koji imaju registrovani obrt i osigurati kontinuitet voćarske proizvodnje, posebno u oblasti proizvodnje jagodičastog voća zbog osiguranja neophodne sirovine za prerađivače.

### A/3 Organska proizvodnja

- 15. Podrška za registrovanu organsku poljoprivrednu proizvodnju** – Podržavaju se organski poljoprivredni proizvođači u oblasti biljne i animalne proizvodnje koji su registrovani kao obrti sa osnovnom djelatnošću prema Zakonu o obrtu i srodnim djelatnostima i podržavaju se organizatori za grupne certifikate organske poljoprivredne proizvodnje. Iznos podrške je do 2.000,00 KM po registrovanom subjektu ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo organske proizvodnje.

### B/ PODRŠKA OTKUPLJIVAČIMA/PRERAĐIVAČIMA

- 16. Podrška otkupljivačima/prerađivačima mlijeka** – Podržavaju se otkupljivači/prerađivači mlijeka registrovani na području Zeničko-dobojskog kantona za otkup svježeg mlijeka proizvedenog na područja Zeničko-dobojskog kantona sa do 0,02 KM po litru a prerađivači mlijeka registrovani na području Zeničko-dobojskog kantona do 0,03 KM po litru, ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo otkupa i prerade.
- 17. Podrška otkupljivačima/prerađivačima pilećeg mesa** – Podržavaju se registrovani otkupljivači/prerađivači brojlerskog mesa sa područja Zeničko-dobojskog kantona iznosom do 0,10 KM/kg, za otkupljenu količinu od kooperanata sa kojima imaju zaključene ugovore o proizvodnji brojlera, ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo otkupa i prerade.
- 18. Podrška otkupljivačima svježeg povrća i voća** – Podržavaju se otkupljivači svježeg povrća i otkupljivači svježeg voća (izuzev jagodičastog i bobičastog voća) do 0,12 KM/kg koji od proizvođača sa područja Zeničko-dobojskog kantona sa kojima imaju zaključene ugovore o otkupu, otkupe svježe povrće i voće te ispunjavaju i druge kriterije koji će biti propisani Uputstvom.  
Cilj: zadržati dostignuti nivo otkupa i ostvariti plasman proizvoda na domaćem i inostranom tržištu.
- 19. Podrška registrovanim otkupljivačima ljekovitog bilja** – Podržavaju se registrovani otkupljivači ljekovitog bilja sa područja Zeničko-dobojskog kantona u iznosu sa 0,20 KM/kg koji od proizvođača sa područja Zeničko-dobojskog kantona sa kojima imaju zaključene ugovore o otkupu, otkupe ljekovito bilje.  
Cilj: zadržati dostignuti nivo otkupa i osigurati plasman proizvoda na domaćem i inostranom tržištu.
- 20. Podrška otkupljivačima jagodičastog voća** - Podržavaju se pravna lica koja sa proizvođačima jagodičastog voća sa područja Zeničko-dobojskog kantona imaju zaključene ugovore o otkupu jagodičastog voća, otkupe i izvrše isplatu prema proizvođačima. Iznos podrške je do 0,20 KM/kg, ukoliko su ispunjeni i drugi kriteriji koji će biti propisani Uputstvom.  
Cilj: zadržati dostignuti nivo otkupa i osigurati plasman proizvoda na domaćem i inostranom tržištu.
- 21. Podrška prerađivačima jagodičastog voća** - Podržavaju se pravna lica koja sa proizvođačima jagodičastog voća sa područja Zeničko-dobojskog kantona imaju zaključene ugovore o otkupu, otkupe i izvrše isplatu prema proizvođačima. Iznos podrške je do 0,30 KM/kg. Prerađivač koji podnosi zahtjev mora imati komore za zamrzavanje i ispunjavati druge kriterije koji će biti propisani Uputstvom. Cilj: zadržati dostignuti nivo otkupa i osigurati plasman proizvoda na domaćem i inostranom tržištu.

## C/ PODRŠKA KAPITALNIM ULAGANJIMA

**22. Podrška za nabavku mehanizacije za poljoprivredu** – Podržava se nabavka nove mehanizacije za poljoprivredu u iznosu do 25% vrijednosti poljoprivredne mehanizacije i priključaka za mehanizaciju za poljoprivredne proizvođače koji imaju registrovanu poljoprivrednu djelatnost kao osnovnu djelatnost registrovanu po Zakonu o obrtu i srodnim djelatnostima, te da su ispunjeni i drugi kriteriji koji će biti propisani Uputstvom.

Cilj: obnavljanje mašinskog parka kod registrovanih poljoprivrednih proizvođača i uvođenje novih tehnologija u obradi i šjetvi.

**23. Podrška projektima u poljoprivredi** – Podržavaju se projekti kojim se modernizuje i unapređuje poljoprivreda uvođenjem savremenih tehnoloških rješenja u svrhu povećanja kapaciteta poljoprivredne proizvodnje, povećanja otkupa poljoprivrednih proizvoda i konkurentnosti na području Zeničko-dobojskog kantona. Uputstvom će se detaljnije propisati način odabira projekata, izvještavanje korisnika sredstava u pogledu roka dostavljanja izvještaja o utrošku i potrebna dokumentacija uz izvještaj o utrošku. Maksimalan iznos podrške iznosi do 25.000,00 KM. Cilj: unapređenje poljoprivrede i osiguranja plasmana proizvoda na domaćem i inostranom tržištu.

**24. Podrška za nabavku plastenika** – Podržava se nabavka novih plastenika do 12,00 KM/m<sup>2</sup>. Podržava se nabavka novih plastenika za poljoprivredne proizvođače koji imaju registrovanu poljoprivrednu djelatnost kao osnovnu djelatnost registrovanu po Zakonu o obrtu i srodnim djelatnostima ili pravna lica te da su ispunjeni i drugi kriteriji koji će biti propisani Uputstvom. Cilj: povećati proizvodne površine u zaštićenom prostoru.

**25. Podrška za uspostavu cjelovitog sistema navodnjavanja uz izgradnju bunara** - Podržava se uspostava cjelovitog sistema navodnjavanja uz izgradnju bunara i nabavku pumpe do nivoa magistralnih vodova (magistralni vodovi – od pumpe do primarnih vodova, primarnih vodova do rezervoara ili razdjelnika za sekundarnu mrežu.) Pravo na podršku mogu ostvariti registrovani poljoprivredni proizvođači, registrovani po Zakonu o obrtu i srodnim djelatnostima – osnovna djelatnost. Maksimalan iznos podrške do 5.000,00 KM.

Cilj: obezbijediti neovisno snabdijevanje poljoprivrednih usjeva sa čistom, tehnološki ispravnom vodom, kako bi se izbjegle štete na usjevima uslijed sušnih perioda, a koji se poklapaju sa proizvodnim ciklusima.

## D/ OSTALE VRSTE PODRŠKI

**26. Podrška za ujednačen razvoj općina ruralnog područja Zeničko-dobojskog kantona** - sa ciljem ravnomjernijeg razvoja poljoprivrede u ruralnom području Zeničko-dobojskog kantona u 2026. godini, iz ukupnog budžeta za poticaje u poljoprivredi izdvajaju se sredstva za dvije općine Zeničko-dobojskog kantona (Olovo i Vareš), koje su u posljednje četiri godine imale najnižu realizaciju poticaja i to manje od 1% od ukupno realizovanih kantonalnih poticaja. Sredstva će se odobravati na osnovu realizovane poljoprivredne proizvodnje na području navedenih općina.

Cilj: Ravnomjerni razvoj općina čija se poljoprivredna proizvodnja zasniva na ruralnom području Zeničko-dobojskog kantona.

**27. Nerealizovani zahtjevi iz prethodnog perioda i pomoć u posebnim okolnostima** - Nerealizovani zahtjevi iz Programa utroška sredstava Budžeta Zeničko-dobojskog kantona za poticaje u poljoprivredi iz ranijih godina za koje nije isplaćena novčana podrška, proistekli kao posljedica administrativnih poteškoća ili kada je proizvođač ostvario pravo u ponovljenom postupku provedenom po pravosnažnoj sudskoj presudi iz oblasti novčanih podrški ili po odluci ministra donesenoj u postupku odlučivanja po prigovoru, ista će se realizovati u skladu sa raspoloživim sredstvima u 2026. godini.

U slučajevima nerealizovanih zahtjeva za poticaje u poljoprivredi iz ranijih godina koji zbog administrativnih poteškoća nisu odobreni, Ministar će rješenjem imenovati komisiju, koja će zapisnički predložiti za koje nerealizovane zahtjeve po navedenom osnovu je novčana podrška osnovana. Sredstva pomoći, kao specifični zahtjevi određenih ustanova, udruženja, fondacija i organizacija ili registrovanih poljoprivrednih proizvođača, a koja se odnose na primarnu poljoprivrednu proizvodnju, edukativne projekte i aktivnosti u svrhu promocije poljoprivrede Zeničko-dobojskog kantona, će biti odobravana u skladu sa raspoloživim sredstvima za ove namjene. Ministar će rješenjem imenovati komisiju, koja će zapisnički predložiti koji zahtjevi za pomoć u posebnim okolnostima su osnovani, što uključuje i procjenu vrijednosti pomoći. Sredstva će odobravati Vlada Zeničko-dobojskog kantona posebnom odlukom, na prijedlog Ministarstva. Cilj: realizovati osnovana potraživanja koja su izostala zbog određenih poteškoća, pomoć subjektima koji obavljaju poljoprivrednu proizvodnju i promociju strateških proizvodnji Zeničko-dobojskog kantona na domaćem i inostranom tržištu.

Tabela 1. Raspodjela sredstava po oblastima i vrstama poljoprivredne proizvodnje za 2026. godinu

	Vrsta proizvodnje	Iznos poticaja izražen po jedinici mjere	Procjena iznosa potrebnih sredstava u (KM)
<b>A/</b>	<b>PODRŠKA POLJOPRIVREDNOJ PROIZVODNJI</b>		
<b>A/1</b>	<b>ANIMALNA PROIZVODNJA</b>		
1.	Podrška za proizvodne farme za tov brojlera	do 4,00 KM/m <sup>2</sup>	450.000,00
2.	Podrška za držanje koka nosilja	do 2,00 KM/pilenki	120.000,00
3.	Podrška za registrovane farme goveda	do 650,00 KM/muznom grlu do 150,00 KM/kravi	2.355.000,00
4.	Podrška za registrovanu ovčarsku ili kozarsku proizvodnju	do 4.000,00 KM/registracija	350.000,00
5.	Podrška za registrovanu svinjogojsku proizvodnju	do 3.000,00 KM/registracija	25.000,00
6.	Podrška za registrovani uzgoj izvornih i zaštićeni pasmina životinja	do 4.000,00 KM/registracija	10.000,00
7.	Podrška za pčelarsku proizvodnju	do 3.000,00 KM/obrt fizička lica do 7,00 KM/pčelinjem društvu	240.000,00
<b>UKUPNO:</b>			<b>3.550.000,00</b>
<b>A/2</b>	<b>BILJNA PROIZVODNJA</b>		
8.	Podrška za poljoprivrednu proizvodnju u plastenicima i staklenicima	do 7,00 KM/m <sup>2</sup>	1.420.000,00
9.	Podrška za proizvodnju maline, kupine, plantažne borovnice, ribizle i aronije	do 0,70 KM/kg	500.000,00
10.	Podrška za proizvodnju krastavca-kornišona	do 0,30 KM/kg	120.000,00
11.	Podrška za zasnivanje novih zasada jagodičastog voća	do 600,00 KM/0,1 ha	20.000,00
12.	Podrška za zasnivanje zasada koštičavog, jabučastog i jezgrastog voća	do 400,00 KM/0,1 ha fizička lica, do 600,00 KM/0,1 ha obrte i pravna lica	20.000,00
13.	Podrška za proizvodnju gljiva	50,00 KM/t komposta	30.000,00
14.	Podršku za registrovanu proizvodnju jagodičastog voća i ostalog voća	do 3.000 KM/obrtu	190.000,00
<b>UKUPNO:</b>			<b>2.300.000,00</b>

<b>A/3</b>	<b>ORGANSKA PROIZVODNJA</b>		
15.	Podrška za registrovanu organsku poljoprivrednu proizvodnju	do 2.000,00 KM/ subjekt	20.000,00
UKUPNO:			<b>20.000,00</b>
<b>B/</b>	<b>PODRŠKA PRERAĐIVAČIMA I OTKUPLJIVAČIMA</b>		
16.	Podrška otkupljivačima/prerađivačima mlijeka	do 0,02 KM/litru otkupljivači do 0,03 KM/litru prerađivači	320.000,00
17.	Podrška otkupljivačima/prerađivačima pilećeg mesa	do 0,10 KM/kg	60.000,00
18.	Podrška otkupljivačima svježeg voća i povrća (izuzev jagodičastog i bobičastog)	do 0,12 KM/kg	40.000,00
19.	Podrška registrovanim otkupljivačima ljekovitog bilja	0,20 KM/kg	10.000,00
20.	Podrška otkupljivačima jagodičastog voća	do 0,20 KM/kg	70.000,00
21.	Podrška prerađivačima jagodičastog voća	do 0,30 KM/kg	50.000,00
UKUPNO:			<b>550.000,00</b>
<b>C/</b>	<b>PODRŠKA KAPITALNIM ULAGANJIMA</b>		
22.	Podrška za nabavku mehanizacije za poljoprivredu	do 25 %	500.000,00
23.	Podrška projektima u poljoprivredi	do 25.000,00 KM/aplikantu	500.000,00
24.	Nabavka plastenika	do 12,00 KM/m <sup>2</sup>	100.000,00
25.	Podrška za uspostavu cjelovitog sistema navodnjavanja uz izgradnju bunara	do 5.000,00 KM/obrt	30.000,00
UKUPNO:			<b>1.130.000,00</b>
<b>D/</b>	<b>OSTALE VRSTE PODRŠKI</b>		
26.	Podrška za ujednačeni razvoj općina ruralnog područja ZDK-a	-	100.000,00
27.	Nerealizovani zahtjevi iz prethodnog perioda i pomoć u posebnim okolnostima	-	50.000,00
UKUPNO:			<b>150.000,00</b>
<b>UKUPNO (A+B+C+D)</b>			<b>7.700.000,00</b>

**Napomena:** Kolone u tabeli koje definišu procjenu potrebnih sredstava u KM su projekcija mogućeg utroška sredstava, tako da će ovisno o broju zahtjeva biti prelijevanja sredstava iz jedne proizvodnje/mjere u drugu.

## VI KORISNICI SREDSTAVA

Korisnici sredstava su fizička lica, obrti, pravna lica i udruženja koja ispunjavaju propisane opće i posebne kriterije iz ovog Programa i Uputstva (poljoprivredni proizvođači, zadruge, udruženja poljoprivrednih proizvođača, otkupljivači, prerađivači poljoprivrednih i prehrambenih proizvoda i dr.).

## VII IZVJEŠTAVANJE

Korisnici programa za određene mjere i aktivnosti iz Programa dužne su izvjestiti Ministarstvo o utrošku sredstava na način kako će biti određeno pojedinačnim odlukama odobravanju sredstava Vlade Zeničko-dobojskog kantona. U slučaju da Korisnici doznačenih sredstava ne dostave izvještaj o namjenskom utrošku sredstava do ostavljenog roka iz odluke Vlade Zeničko-dobojskog kantona neće imati pravo aplicirati za dodjelu sredstva u narednoj godini.

O utrošku sredstava po ovom Programu, Ministarstvu za poljoprivredu, šumarstvo i vodoprivredu dužno je polugodišnje i godišnje izvještavati Vladu Zeničko-dobojskog kantona.

Broj: 02-11-6301/26  
Datum, 27.03.2026. godine  
Zenica

**PREMIJER**

*Nezir Pivić*

### DOSTAVLJENO:

1x Ministarstvo za poljoprivredu, šumarstvo i vodoprivredu,  
1x Ministarstvo finansija,  
1x „Službene novine Zeničko-dobojskog kantona“,  
1x a/a.